

Yon Taran Chóiq Alang Mui Parnai Cato

Yon taran chóiq alang mui ndô sám 90 cumo vít Yê-su carnian. Án coiq chóiq alang ndô dőq alang máh acái amon án tớq top tin. Án la munáq te top rian te Yê-su. Alúng ndóng án taran chóiq alang ndô, án khoiq ieuq lư dyo. Án tông te Yê-su, alúng án dőq Yê-su la Parnai Tumõng. Án ngin án khoiq hôm Yê-su, alúng bôn capoiq cháq Yê-su. Iki án têq tông piaiq alúng arlóih lư te máh arnáq Yê-su khoiq táq, alúng te máh callong Yê-su khoiq tông.

Uráq ndô tông te Yang Arbang-pilõng la ntúq ang, alúng catóih tông top tin cóq ticaq pôq tớq ntúq ang ngki. Án dyöq máh top tin êq cammáng máh parnai ticuoi táq náh-nnan tang ngcang Yang Arbang-pilõng, co nha-án ính caryáh top tin dyôn cốt a-uí top. Máh ticuoi táq náh-nnan cato ngki tông, Yê-su tới Acái Yang Arbang-pilõng Cot Ticuoi. Nha-án parngih, khán Yang Arbang-pilõng khoiq taláh he, ngki he lóiq tûh cóq át artoi munoi, lóiq la amoih ticuoi cannõh.

Uráq ndô catóih máh ticuoi tin alúng dyöq êq ayáu ngê tớq pang ndô. “Co máh nõh tớq pang ndô ndon ticuoi báq ham, mát ticuoi báq me alúng ính bôn, díh ticuoi báq cuhõng; máh nõh ndô lóiq bôn tớq te Yang Arbang-pilõng, ma tớq te pang ndô.” (Phê 2:16)

Parnai Tumōng

¹ He taran parnai ndô dőq tông inha te Parnai Tumōng.* Án tumōng munɔi alúng Yang Arbang-pilōng te Yang Arbang-pilōng iyőh teng pilōng cuteq. He khoiq sáng sieng án, mát he khoiq hôm án, alúng ati he khoiq capoiq cháq án.

² Parnai Tumōng ndô khoiq tóq nga he, alúng he khoiq hôm án. Iki he têq taran tông inha te arnáq ngki. Parnai Tumōng ndô át níc-níc alúng Yang Arbang-pilōng A-ám án, alúng án khoiq tóq nga he dyo'.

³ He taran ính inha chom te máh arnáq he khoiq hôm alúng máh nőh he khoiq sáng te án, co he ính inha át mui mít alúng he, aróq he át mui mít alúng Yê-su Crit nha Yang Arbang-pilōng A-ám án.

⁴ Iki he taran parnai ndô ính inha sáng bui cannính munɔi alúng he, dyo' mít cannính he bôn máng callong bui hør sóng.

Yang Arbang-pilōng La Callong Ang

⁵ Ndô la parnai he khoiq sáng Yê-su cato, alúng he ính inha chom tui: Yang Arbang-pilōng la callong ang. Callong ngiau lóiq têq át alúng án.

⁶ Iki, khán he ngin he át mui mít alúng Yang Arbang-pilōng, ma he yôl táq arnáq saq, ngki la aróq he ticaq tóq ntúq ngiau alúng táq-ntêr a-uai sóng. Co parnai he tông lóiq bôn tarpiaiq alúng arnáq he táq.

⁷ Ma khán he táq arnáq Yang Arbang-pilōng, ngki la aróq he ticaq tóq ntúq ang, co Yang

* **1:1 1:1** Parnai Tumōng la Yê-su Crit.

Arbang-pilōng la ntúq ang. Iki, he munáq artoi alúng munáq. Alúng Yang Arbang-pilōng táq práh mít cannínhe te callong luaih he, co nhó te aham Yê-su Acái án.

⁸ Khán he tông he lóiq bôn luaih amóh, la he pilōh cháq he bôm. Alúng tóq mít cannínhe óq lóng callong lú.

⁹ Khán he ngin luaih ada Yang Arbang-pilōng te máh arnáq he khoiq táq, án lú táh luaih dyôn he aróq án khoiq ưq dyo, co án la tinóng ǒ alúng táq piaiq níc. Alúng án táq dyôn mít cannínhe he cốt práh ǒ lóiq ính táq nnáng arnáq saq.

¹⁰ Khán he táq-ntér he lóiq nai táq luaih, callong ngki la aróq he tông Yang Arbang-pilōng táq-ntér a-uai, co án tông nhéq tûh ticuoi bôn luaih. Iki parnai án lóiq át tóq mít cannínhe he.

2

Yê-su Crit Choi He

¹ Máh acái amon cư ơi! Cư taran máh parnai ndô la dőq inha têq viar vít te arnáq luaih. Ma khán bôn nnáu te inha táq luaih, Yê-su Crit án ndon tinóng ǒ, án lú tartông choi he chứng mát Yang Arbang-pilōng.

² Án khoiq cuchet tang he la co tian he táq luaih, alúng tój án cuchet tang núm dyôn he sống, ma dyôn díh nhéq tûh ticuoi tóq cúc cuteq ndô hó.

³ Khán he peh máh callong Yang Arbang-pilōng patáp, ngki têq he ngin he chom án.

⁴ Ma khán bôn ticuoi tông idô: “Cư chom Yang Arbang-pilōng,” ma án lóiq peh máh callong

Yang Arbang-pilǒng patáp, ngki án táq-ntêr a-uai
sóng, alúng callong lư óq lóng tóq mít canninh
án.

⁵ Ma ticuoi mmo peh parnai Yang Arbang-pilǒng la án amoih Yang Arbang-pilǒng nhéq tarngúh tarho'. Co he táq iki, he chom arlóih lư he át mui mít alúng Yang Arbang-pilǒng.

⁶ Alúng ticuoi mmo ngin án át mui mít alúng Yang Arbang-pilǒng, cóq án táq muchúng Yê-su khoiq táq dyo'.

Parnai Patáp Tieq Pien Cöt Parnai Patáp Tamme Loi

⁷ Em ai cư ơi! Parnai cư taran patáp inha hoi-ndô la tới parnai patáp tamme. Ma parnai ndô la parnai tieq; inha bôn parnai ndô te ingái inha mbɔ̄iq mot tin Yê-su Crit. Parnai patáp ndô ngai khoiq tông inha te nsuoi dyo'.

⁸ Ma hoi-ndô cư taran parnai patáp ndô dyôn inha, la cöt aróq parnai patáp tamme. Parnai patáp ndô la parnai piaiq. Yê-su khoiq apáh parnai ndô, alúng inha khoiq apáh tui. Iki callong ngiau chón ính pít, alúng callong ang chón lóng-róng claq dyo'.

⁹ Ticuoi mmo tông án át tóq ntúq ang, ma án a-ính máh em ai án, iki án yôl át tóq ntúq ngiau.

¹⁰ Ma ticuoi mmo amoih em ai, ngki án lư át tóq ntúq ang. Iki lóiq bôn amóh têq táq dyôn án arbúc.

¹¹ Ma ticuoi mmo a-ính em ai, ngki án yôl át tóq ntúq ngiau, alúng án yôl ticaq tóq ntúq ngiau lóiq chom carna mmo ính pôq, co callong ngiau ngki táq dyôn án cöt aróq ticuoi sot mát.

¹² Cư taran parnai ndô dyôn inha ndon cốt aróq acái cư ama, co Yang Arbang-pilöng khoiq táh dyo' luaih inha la co nhơ Yê-su Crit cuchet tang inha.

¹³ Cư taran parnai ndô dyôn inha ndon cốt a-ám, co inha khoiq chom Yê-su án ndon át munoi alüng Yang Arbang-pilöng te Yang Arbang-pilöng iyôh teng pilöng cuteq. Cư taran parnai ndô dyôn inha ticuoi yôl bánh, co inha khoiq chíl rap dyo' yang Satán.

¹⁴ Cư taran parnai ndô dyôn inha ndon yôl ngai-acái, co inha khoiq chom dyo' A-ám tóq pilöng. Cư taran parnai ndô dyôn máh ticuoi a-ám, co inha khoiq chom Yê-su án ndon át alüng Yang Arbang-pilöng te Yang Arbang-pilöng iyôh teng pilöng cuteq. Cư taran parnai ndô dyôn inha ndon yôl bánh, co inha la ticuoi bánh rêng, alüng parnai Yang Arbang-pilöng át níc tóq mít canninh inha; inha khoiq chíl rap dyo' yang Satán.

¹⁵ Inha êq amoih pang ndô alüng êq ham máh nôh tóq pang ndô. Khán ticuoi mmo amoih pang ndô, án lóiq amoih nnáng Yang Arbang-pilöng.

¹⁶ Co máh nôh tóq pang ndô ndon ticuoi báq ham, mát ticuoi báq me alüng ính bôn, díh ticuoi báq cuhöng, máh nôh ndô lóiq bôn tóq te Yang Arbang-pilöng, ma tóq te pang ndô.

¹⁷ Pang ndô alüng máh nôh ndon ticuoi báq ham tóq pang ndô, uróh lư pít nhéq. Ma ticuoi mmo veng canninh Yang Arbang-pilöng, ticuoi ngki lư bôn tumöng níc-níc.

Munáq Picon Yē-su

¹⁸ Máh acái amon cư ơi! Pang ndô la pang talloiq tháng. Inha khoiq sáng dyo' ngai tông uróh bôn munáq ndon ính picon ada Crit, lư tóq. Alúng hoi-ndô bôn clúng ticuoi cót picon ada Crit. Co iki he chom pang ndô la pang talloiq tháng.

¹⁹ Máh ticuoi ngki chóng ngóh bôm te top he, co nha-án lóiq át mui mít alúng he. Khán nha-án lư át mui mít alúng he, ngki nha-án yôl át mui top alúng he. Ma tư nha-án ngóh, nha-án apáh dyón nhéq máh ticuoi chom arlóih nha-án tới top he.

²⁰ Ma inha khoiq bôn Arvai Yang Arbang-pilõng át tóq mít cannính inha. Iki nhéq máh inha chom arlóih te callong piaiq.

²¹ Cư taran parnai ndô dyón inha, tới co inha iyôh chom callong piaiq, co inha khoiq chom dyo' callong ngki, alúng inha chom arlóih lư callong a-uai lóiq nai ngóh te callong piaiq.

²² Ticuoi mmo tông, Yē-su tới Crit, ticuoi ngki la ticuoi a-uai, alúng án cót picon ada Crit. Án calóih Yang Arbang-pilõng alúng Acái Yang Arbang-pilõng hơ.

²³ Ticuoi mmo calóih Acái Yang Arbang-pilõng, la muchúng án calóih Yang Arbang-pilõng tui. Alúng ticuoi mmo tin Acái Yang Arbang-pilõng, la muchúng án tin Yang Arbang-pilõng tui.

²⁴ Iki cóq inha cadyom dõq tóq mít cannính inha máh parnai inha khoiq sáng dyo' te ingái inha mboiq tin Yē-su. Khán inha cadyom dõq máh parnai ngki tóq mít cannính inha, ngki inha

át artoi níc alúng Acái Yang Arbang-pilǒng nha A-ám án hօ.

²⁵ Yang Arbang-pilǒng khoiq ưq ada he idō: Ăn dyôn he bôn tumǒng níc-níc.

²⁶ Cư taran máh parnai ndô dőq tông dyôn inha chom te máh ticuoi ndon ính tarphiq inha dyôn tách ngê Yê-su.

²⁷ Ma Yang Arbang-pilǒng khoiq dyôn inha bôn Arvai án át tօq mít cannính inha. Co inha bôn Arvai án, iki inha lóiq túh ngai tông inha ngê mmo piaiq alúng ngê mmo lóiq piaiq. Lư simót Arvai án táp tông inha te nhéq máh nőh ngki. Alúng máh parnai án tông dyôn inha chom la piaiq nhéq; án lóiq bôn tông inha mui callong tarphiq. Cóq inha peh nhéq máh parnai Arvai án tông inha; iki inha cốt mui mít alúng Yê-su Crit.

²⁸ Dyօ hoi-ndô, acái amon cư օi, cóq inha át níc mui mít alúng Yê-su, dőq he dáh tayúng cloq lư alúng lóiq sáng achiet amóh tօq ingái Yê-su siar lieh nga cúc cuteq ndô.

²⁹ Khán inha chom Yê-su Crit la lư tinóng ጀ, iki inha chom tui ticuoi mmo táq tinóng ጀ, ticuoi ngki la acái Yang Arbang-pilǒng.

3

He Cot Acái Yang Arbang-pilǒng

¹ Inha parngíh dyôn simót máh-mmo a-uri Yang Arbang-pilǒng a-ám he amoih he. Co án amoih lư he, iki án dőq he la acái án. Dyօ he lư cốt acái án. Ma máh ticuoi ndon veng ngê tօq pang ndô

lóiq chom he, co nha-án lóiq chom Yang Arbang-pilöng.

² Máh em ai ơi! He la acái Yang Arbang-pilöng. Ma he iyôh chom arlóih, tóq cua he át tóq pang ndô, cháq he cốt róp imo loi. Ma mui callong he chom arlóih lư la idô: Tóq ingái Yê-su Crit tóq lieh, he bôn cốt aróq án tui, co ingái ngki he bôn hôm án arlóih lư.

³ Ticuoi mmo ngcong ính bôn hôm Yê-su tóq lieh ingái ngki, cóq án kiaq me mít canninh án dyôn prâh ő, muchứng Yê-su Crit bôn mít canninh prâh ő.

⁴ Ticuoi mmo táq luaih, la aróq án luan phep rit Yang Arbang-pilöng. Alứng khán án luan phep rit Yang Arbang-pilöng, arnáq ndô la luaih lư.

⁵ Inha chom Yê-su Crit khoiq siar nga cuteq ndô la dőq pupít nhéq máh luaih he. Alứng inha chom án lóiq nai bôn luaih.

⁶ Iki, ticuoi mmo át mui mít alứng Yê-su, ticuoi ngki lóiq táq nnáng arnáq luaih. Ma ticuoi mmo táq arnáq luaih, ticuoi ngki lóiq nai hôm alứng lóiq nai chom Yê-su.

⁷ Máh acái amon cư ơi! Êq dyôn ngai pilöh inha. Ticuoi mmo táq tinóng ő, án lư cốt tinóng ő chứng mát Yang Arbang-pilöng, muchứng Yê-su la tinóng ő chứng mát Yang Arbang-pilöng.

⁸ Ticuoi mmo báq táq arnáq saq, án ngki tóq te yang Satán. Co te tôm tháng yang Satán táq níc arnáq luaih. Co iki Acái Yang Arbang-pilöng siar nga cúc cuteq ndô dőq taloh pupít nhéq máh arnáq yang Satán.

⁹ Ticuoi mmo cöt acái Yang Arbang-pilöng, ticuoi ngki lóiq táq nnáng arnáq luaih, co Yang Arbang-pilöng dyôn cannính án át tóq mít ticuoi ngki. Iki ticuoi ngki lóiq têq táq nnáng arnáq luaih, co ticuoi ngki la acái Yang Arbang-pilöng.

¹⁰ Bôn tíc dyôn he têq chom, ticuoi mmo la acái Yang Arbang-pilöng, alüng ticuoi mmo la acái yang Satán la idô: Ticuoi mmo táq lóiq tinóng ö alüng óq mít cannính amoih yóu, án tối acái Yang Arbang-pilöng, ma án la acái yang Satán.

Cóq Munáq Amoih Munáq

¹¹ Te ingái inha mboiq tin Yê-su Crit, inha khoiq sáng dyo callong patáp ndô: He cóq munáq amoih munáq.

¹² He êq táq aróq Ca-in. Án soi yang Satán, alüng án cachet a-em án. Co imo án cachet a-em án? Co án táq arnáq saq, ma a-em án táq arnáq tinóng ö.

¹³ Iki em ai oï, êq dut amóh khán ticuoi ndon veng ngê tóq pang ndô a-ính inha.

¹⁴ Khán he amoih máh em ai he tóq top tin, ndô la aróq he khoiq cuchet ma bôn tumöng lieh. Ma khán ticuoi mmo lóiq amoih yóu, la aróq án yôl cuchet.

¹⁵ Ticuoi mmo a-ính em ai bôm, án la muchüng ticuoi khoiq cachet ticuoi. Alüng inha chom dyo, ticuoi cachet ticuoi lóiq têq bôn callong tumöng níc-níc.

¹⁶ Imo he têq chom te callong amoih? He chom callong ngki la co nhö te Yê-su Crit chiuq pít tarngúh án tang he. Piaiq lú la he loi cóq chiuq pít tarngúh döq tarchoi em ai he.

17 Khán ticuoi mmo bôn khám tóc khám cha, alúng án hôm em ai án óq, ma án lóiq sáng sruiq táq, ngki án lóiq téq tông án bôn mít cannính amoih te Yang Arbang-pilöng.

18 Acái amon ơi, khán he amoih yóu, cóq he êq amoih numtóng ngcang sống. Ma cóq he amoih yóu nhéq te mít cannính, alúng cóq he táq dyön ticuoi cannöh chom he lư amoih.

He Lóiq Bôn Sáng Crôq

19 Khán he táq iki, he chom arlöih he la acái Yang Arbang-pilöng, án ndon tông níc parnai piaiq. Alúng he sáng clöq lư tóq chứng mát án.

20 Tam mít he tíq cháq he bôm, he lóiq sáng crôq amóh, co Yang Arbang-pilöng sút hơn te mít cannính he, alúng án chom cúp nőh.

21 Em ai ơi! Khán mít he lóiq bôn tíq cháq he bôm, he cốt clöq tóq chứng mát Yang Arbang-pilöng.

22 Nőh amóh he seq te Yang Arbang-pilöng, án lư dyön he bôn nőh ngki, co he peh máh parnai án patáp, alúng he táq máh arnáq án ính he táq.

23 Ndô la parnai Yang Arbang-pilöng patáp he: Cóq he tin Acái án Yê-su Crit, alúng cóq he munáq amoih munáq, aróq Yê-su khoiq patáp he.

24 Ticuoi mmo peh máh parnai Yang Arbang-pilöng patáp, ticuoi ngki át mui mít alúng Yang Arbang-pilöng, alúng Yang Arbang-pilöng át mui mít alúng ticuoi ngki. Co Yang Arbang-pilöng khoiq dyön Arvai án át tóq mít cannính he, iki he chom arlöih Yang Arbang-pilöng át mui mít alúng he.

4

Te Arnáq Chim Ticuoi

¹ Em ai ơi! Inha êq tin parnai cúp náq ticuoi ndon ngin án bôn Arvai Yang Arbang-pilõng át tóq mít canninh án. Ma cóq inha chim án, dõq inha têq chom arlóih án tóq te Yang Arbang-pilõng ma lóiq. Co bôn a-uri náq ticuoi pôq tudô pôq tuki táq náh-nnan cato tang ngcang Yang Arbang-pilõng.

² Ndô la tíc dyôn inha têq chom ticuoi ngki lư bôn Arvai Yang Arbang-pilõng ma lóiq: Ticuoi mmo ngin Yê-su Crit la Acáí Yang Arbang-pilõng Cot Ticuoi, inha chom ticuoi ngki bôn Arvai Yang Arbang-pilõng tóq mít canninh án.

³ Ma ticuoi mmo tông Yê-su tới Acáí Yang Arbang-pilõng Cot Ticuoi, lư inha chom ticuoi ngki óq Arvai Yang Arbang-pilõng. Ma ticuoi ngki tóq te án ndon cot picon ada Crit. Inha khoiq sâng ngai táq-ntêr uróh bôn munáq ngki tóq, alúng hoi-ndô án át tóq cúc cuteq ndô dyo.

⁴ Mäh acáí amon ơi, inha khoiq cõt acáí Yang Arbang-pilõng dyo. Alúng inha khoiq chil rap dyo mäh ticuoi ndon tông parnai lóiq piaiq, co inha bôn Arvai Yang Arbang-pilõng át alúng inha. Alúng Arvai ngki la püt hñor te yang Satán ndon sút mäh ticuoi ndon veng ngê tóq pang ndô.

⁵ Mäh ticuoi ngki parngíh nûm ngê tóq pang ndô sóng, alúng parnai nha-án cato la veng ngê tóq pang ndô. Co iki mäh ticuoi ndon veng ngê tóq pang ndô ính lư cammáng parnai nha-án.

6 Ma he la na Yang Arbang-pilǒng. Iki ticuoi mmo chom Yang Arbang-pilǒng, ticuoi ngki cammáng parnai he cato. Ma ticuoi mmo tói na Yang Arbang-pilǒng, ngki án lóiq cammáng parnai he. Ndô la tíc dyôn he chom te ticuoi bôn Arvai piaiq alúng te ticuoi bôn arvai thét.

Callong Amoih Tóq Te Yang Arbang-pilǒng

7 Em ai ơi! He cóq munáq amoih munáq, co callong amoih tóq te Yang Arbang-pilǒng. Ticuoi mmo amoih yóu, án lư cốt acai Yang Arbang-pilǒng, alúng án chom Yang Arbang-pilǒng.

8 Ticuoi mmo lóiq amoih yóu, ngki án lóiq chom Yang Arbang-pilǒng, co Yang Arbang-pilǒng la tôm callong amoih.

9 Yang Arbang-pilǒng apáh dyôn he chom án amoih he la idô: Án bôn nûm mui lám acai, ma án yua Acái án tóq nga cúc cuteq ndô la dőq he têq bôn tumőng níc-níc nhơ te Acái án.

10 Callong amoih piaiq lư la idô: Tói he amoih Yang Arbang-pilǒng, ma Yang Arbang-pilǒng amoih he, alúng án yua Acái án cuchet tang he cốt crong mõp sang dőq pupít nhéq luaih he.

11 Em ai ơi! Co Yang Arbang-pilǒng amoih he aróq ngki, iki cóq he munáq amoih munáq tui.

12 Lóiq nai bôn ticuoi mmo hôm Yang Arbang-pilǒng. Ma khán he munáq amoih munáq, ngki he chom Yang Arbang-pilǒng át alúng he, alúng callong amoih te án cốt sút tóq mít cannínhe.

¹³ He têq chom Yang Arbang-pilǒng át alúng he, alúng he át mui mít alúng án la co án khoiq dyōn Arvai án át tóq mít cannính he.

¹⁴ He khoiq chom dyo, alúng he cato níc inh ticuoi cannǒh chom Yang Arbang-pilǒng khoiq yua Acái án tóq nga cúc cuteq ndô dǒq choi tamǒng nhéq tūh ticuoi.

¹⁵ Ticuoi mmo ngin Yē-su la Acái Yang Arbang-pilǒng, Yang Arbang-pilǒng lư át mui mít alúng án, alúng án át mui mít alúng Yang Arbang-pilǒng.

¹⁶ Iki he chom alúng tin, Yang Arbang-pilǒng amoih he a-uĩ lư.

Yang Arbang-pilǒng ráp la tôm callong amoih. Ticuoi mmo bôn mít cannính amoih, ticuoi ngki át mui mít alúng Yang Arbang-pilǒng, alúng Yang Arbang-pilǒng át mui mít alúng ticuoi ngki.

¹⁷ Callong amoih te Yang Arbang-pilǒng cốt sút tóq mít cannính he, la dǒq he dáh tayúng chưng mát án tóq ingái án súq nhéq tūh ticuoi, co ndóng he át tóq cuteq ndô, he át mui mít alúng Yē-su.

¹⁸ Ticuoi mmo bôn mít cannính amoih, ticuoi ngki lóiq sáng adáh, co callong amoih nhéq-mma pupít callong adáh. Khán ticuoi mmo yôl sáng adáh, ticuoi ngki iyőh bôn callong amoih cốt sút tóq mít cannính án, co án yôl adáh Yang Arbang-pilǒng táq tôt án.

¹⁹ He têq bôn mít cannính amoih la co Yang Arbang-pilǒng khoiq amoih he nsuoi.

²⁰ Khán bôn ticuoi tông idô: “Cư amoih Yang Arbang-pilǒng,” ma án a-ính em ai án bôm, ngki

án táq-ntêr a-uai. Khán án lóiq amoih em ai ndon át munoi alứng án, ngki imo têq án amoih Yang Arbang-pilöng ndon án lóiq nai hôm?

²¹ Yê-su Crit khoiq patáp he idô: Ticuoi mmo amoih Yang Arbang-pilöng, cóq án amoih em ai án hơ.

5

He Chîl Rap Máh Ngê Tórq Pang Ndô

¹ Ticuoi mmo tin Yê-su la lư Crit, án ndon Yang Arbang-pilöng rêm dőq choi tamöng ticuoi, ticuoi ngki lư cot acái Yang Arbang-pilöng. Alứng nhéq tûh ticuoi ndon amoih A-ám, lư nha-án amoih dih acái án hơ.

² Ndô la tíc dyôn he têq chom he amoih máh acái acon Yang Arbang-pilöng: Khán he amoih Yang Arbang-pilöng alứng peh máh parnai án patáp, iki he chom he amoih máh acái acon án hơ.

³ He chom he amoih Yang Arbang-pilöng, khán he peh máh parnai án patáp. Alứng máh parnai án patáp lóiq ntáng amórh dyôn he.

⁴ Nhéq tûh ticuoi ndon cot acái Yang Arbang-pilöng têq chîl rap máh ngê tórq pang ndô. Co imo he têq chîl rap máh ngê tórq pang ndô? He bôn chîl rap la co he tin Yê-su.

⁵ Ticuoi mmo têq tarchíl rap máh ngê tórq pang ndô? Lư num máh ticuoi ndon tin Yê-su Acái Yang Arbang-pilöng ráp têq chîl rap máh ngê tórq pang ndô.

Pe Nôh Tông Te Yê-su

6 Tư Yê-su Crit tớq nga cúc cuteq ndô, án cliau bar tíc dyôn ticuoi têq chom án la Crit ndon Yang Arbang-pilöng rêu dőq choi tamöng ticuoi. Tíc mui la tíc na dőq ndon Yê-su ráp. Ma án lóiq cliau nûm tíc na dőq sórning. Ma án cliau tíc bar ho. Tíc bar la aham ndon ngôh te cháq án tớq ingái án cuchet tang he. Alúng Arvai Yang Arbang-pilöng tông te án tui, co Arvai Yang Arbang-pilöng la tôm callong piaiq.

7 Iki Yang Arbang-pilöng dyôn pe nôh dőq cốt tíc tông te Yê-su Crit.

8 Mui la Arvai Yang Arbang-pilöng. Bar la tíc na dőq. Pe la aham ndon ngôh te cháq Yê-su. Iki pe nôh ndô tông muchứng nhéq te Yê-su Crit.

9 Khán he cammáng parnai ticuoi tông te Yê-su, callong ngki lư ő. Ma Yang Arbang-pilöng la sút pǖt hơ̄n. Iki ő hơ̄n he cammáng parnai Yang Arbang-pilöng khoiq tông te Acáí án.

10 Ticuoi mmo tin Acáí Yang Arbang-pilöng, ticuoi ngki lư tin máh parnai Yang Arbang-pilöng tông te Acáí án. Ma ticuoi mmo lóiq tin Acáí Yang Arbang-pilöng, la aróq ticuoi ngki tông Yang Arbang-pilöng táq-ntér a-uai, co ticuoi ngki lóiq tin máh parnai Yang Arbang-pilöng tông te Acáí án.

11 Yang Arbang-pilöng tông dyôn he chom arlóih lư la idô: Án khoiq dyôn he bôn tumöng níc-níc, alúng án dyôn he bôn tumöng ngki la co nhơ te Acáí án.

12 Ticuoi mmo át mui mít alúng Acáí Yang Arbang-pilöng, ticuoi ngki bôn tumöng níc-níc. Ma ticuoi mmo lóiq át mui mít alúng Acáí án,

ticuoi ngki óq bôn tumõng níc-níc.

Callong Tumõng níc-níc

¹³ Cư khoiq taran máh parnai ndô dyôn inha ndon khoiq tin Acái Yang Arbang-pilõng, dõq inha chom, inha bôn tumõng níc-níc.

¹⁴ Khán bôn nõh amóh he ính seq te Yang Arbang-pilõng, he lóiq sáng adáh ndóng he seq te án, co he chom khán he seq nõh amóh veng canninh án, lư án cammáng he.

¹⁵ Alúng khán he chom Yang Arbang-pilõng cammáng he seq te án, ngki he chom arlóih án lư dyôn nõh he khoiq seq.

¹⁶ Khán inha hôm munáq em ai táq luaih, cóq inha cörü seq Yang Arbang-pilõng choi án dyôn bôn tumõng níc-níc. Khán án lóiq tách ngê Yang Arbang-pilõng, lư Yang Arbang-pilõng choi án dyôn bôn tumõng. Ma khán án khoiq tách ngê Yang Arbang-pilõng, án cóq chiuq cuchet tháng. Alúng cư lóiq yua inha cörü dyôn ticuoi ndon táq iki.

¹⁷ Arnáq amóh ticuoi táq ma lóiq tinóng ő, arnáq ngki lư luaih. Ma bôn luaih ndon lóiq dyôn ticuoi cuchet.

¹⁸ He chom ticuoi mmo khoiq cốt acái Yang Arbang-pilõng, ticuoi ngki lóiq táq nnáng arnáq luaih, co Acái Yang Arbang-pilõng át kiaq níc án. Iki yang Satán lóiq têq táq án.

¹⁹ He chom he cốt acái Yang Arbang-pilõng, ma máh ticuoi ndon veng ngê törq pang ndô, ulla nha-án la yang Satán.

²⁰ Alúng he chom arlóih lư, Acái Yang Arbang-pilõng khoiq tóq nga cúc cuteq ndô, dõq põh mít canninh he dyôn chom arlóih te Yang Arbang-pilõng la Yang piaiq. He át mui mít alúng án, la co he át mui mít alúng Acái án Yê-su Crit. Án táp la Yang piaiq, alúng nûm án táp téq dyôn tumõng níc-níc.

²¹ Máh acái amon cư ơi! Cóq inha kiaq me ၎ mít inha bôm. Cóq inha át yõng te máh yang ndon tới lư yang.

**Parnai Yang Arbang-pilǒng: Tám Uraq
Tamme Cang Cadô
Pacoh: Parnai Yang Arbang-pilǒng: Tám Uraq
Tamme Cang Cadô (Bible)**

copyright © 2019 Wycliffe Bible Translators, Inc.

Language: (Pacoh)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022
81799e9a-66b4-5f52-ad41-286ef093d83d